



Gutpela Wasman

No 2/2017

**Jisas Krai i tok,
“Mi gutpela wasman
bilong sipsip.”**

Jon 10.11

Blut bilong Jisas i wasim yumi na yumi stap klin

Blut bilong Jisas i wasim yumi olsem wanem?

Jenis em i wanpela liklik gel long kantri Amerika na em i winim 4-pela krismas pinis. Wanpela Sande moning em i go long Sande Skul. Taim em i kam bek long haus, em i askim mama bilong em olsem, “Mi inap waswas long blut tu, a?”



Mama i tok, “Yes. Em husat i tokim yu olsem?” Jenis i tok, “Sande Skul tisa i tok mipela i mas waswas long blut bilong **Jisas**.” Bobi, bikpela brata bilong Jenis, i harim dispela tok na em i lap, tasol papa i lukim Bobi na i tanim het long em.

Bihain em i lukluk stret long Jenis na i tokim em olsem, “Sande Skul tisa bilong yu i no tok long yu bai waswas long blut olsem yu save waswas long wara. Nogat. Tisa i tok yu mas larim **Jisas** i kam insait long laip bilong yu na bai em i ken wasim na rausim olgeta sin long laip bilong yu, olsem wara i save wasim na rausim olgeta doti bilong bodi.”

Tasol Jenis i no klia yet na i askim gen, “Bilong wanem **Jisas** i ken mekim olsem wantaim blut bilong em yet?” Papa i tokim em gut gen olsem, “Taim **Jisas** i dai antap long diwai kros, bodi bilong em i bin bruk

na blut i bin ron i kam aut long han na lek na het na sait bilong em. **Jisas** i givim blut bilong em yet long yumi. Dispela i olsem em givim laip bilong em yet olgeta long yumi. Taim yumi bilip long dispela wok, God i lusim olgeta sin bilong yumi."

Jenis i askim gen olsem, "Bilong wanem **Jisas** i mas i dai long sin bilong yumi?" "Orait, Jenis yu lukim mi," papa i tok. "Yumi olgeta i gat kain kain asua long bel na tingting bilong yumi.

Yumi no dispela kain manmeri God i amamas long lukim. Nogat tru. **Jisas** i mas dai antap long diwai kros, bai olgeta sin i ken pinis long laip bilong yumi na yumi ken kisim nupela laip i kam long God." Nau mama i soim wanpela doti poteto long Jenis na i tok, "Yu lukim,

mi wasim poteto na nau em i klin pinis. Wara i wasim olgeta doti bilong poteto i go pinis. Olsem tasol, Baibel i tokim yumi, blut bilong **Jisas** i wasim na i klinim olgeta sin bilong yumi. Taim yumi bilip olsem **Jisas** i bin dai long sin bilong yumi, God i lusim olgeta sin bilong yumi, olsem na Baibel i tok long **Jisas** i mekim yumi klin long blut bilong en."

Jenis i no klia olgeta long dispela tok, tasol isi isi em i klia gut tru. Nau em i laikim **Jisas** na tok tenkyu long **Jisas** i bin kisim bek em na rausim olgeta sin bilong em pinis.

Jenis i harim gut tok bilong Sande Skul Tisa na em i kam askim mama long kliaim em gen. Papa na mama i toktok moa na i kliaim gut wok bilong **Jisas** long diwai kros na wok bilong blut bilong Jisas long klinim sin long laip bilong yumi manmeri. Jenis i askim planti, tasol bihain isi isi gutnius i klia long em na em i givim laip bilong em yet olgeta long **Jisas**.

Hibru 10.22a i tok, "Em i bin tromoi blut bilong en long bel bilong yumi, bilong pinisim asua bilong ol pasin nogut yumi bin mekim na bilong mekim yumi i save olsem yumi stap klin tru long ai bilong God."



Ol wokmanmeri bilong Bikpela i wok long autim gutnius bilong **Jisas Kra**is long yumi ol manmeri na pikinini. Tasol sampela manmeri

i harim dispela tok na ol i lap tasol na i givim baksait olsem Bobi. Ol i mekim gutnius i kamap olsem tok nating na ol i no laik long askim na painimaut gut as tru bilong em. Gutnuis i no kamap klia long ol, olsem na senis tru i no kamap long laip bilong ol na ol i stap long tudak yet. Tasol sampela manmeri na pikinini i harim gut dispela gutnius na ol i save tru olsem pawa bilong tekewe sin i stap insait long blut bilong Jisas. Ol i givim ol yet olgeta long **Jisas** na waswas long blut bilong em. Ol i kamap fri tru na klin olgeta long ai bilong God. Ol i kisim pinis nupela laip bilong i stap

gut oltaim oltaim i kam long God. Moa yet ol i kisim nem pikinini bilong God olsem Jon 1.12 i tokaut, *"Tasol sampela manmeri i kisim em, em ol lain i bilip long nem bilong em. Na em i givim namba long ol bai ol i ken kamap pikinini bilong God."*

Yu waswas pinis long blut bilong Jisas o nogat?

Translated by Guwa team (More Little Visits With God)

No ken ting yu stap klin

Boi Lari i save stap long kantri Amerika. Wanpela apinun, taim bilong kaikai na Lari i kam long kaikai. Mama bilong Lari i askim em, "Lari yu waswas pinis, a? Pes na han na lek na olgeta bodi stap klin, a?" "Yes mama, mi waswas pinis na mi stap klin," Lari i tok. Tasol taim mama i kam klostu, em i lukim Lari i gat doti long yau na aninit long maus na insait long han pinga bilong em. "Lari yu no ken tok yu stap klin, planti doti i stap yet." "Mama, mi ting mi stap klin," Lari i tok. Mama i tokim Lari long go na waswas gen.



Namba tu taim mama i lukim olsem Lari i no i stap klin. Olsem

na mama yet i kisim Lari i go na wasim em. Na dispela taim Lari i stap klin.

Planti manmeri na pikinini i save tok olsem Lari. Ol i save ting ol i stap klin. Ol i mekim planti ol gutpela pasin. Ol i stap insait long sios. Ol i kamap long Kristen famili. Tasol taim God i lukim yumi, sin i pulap long laip bilong yumi. Yumi no stap klin yet. Nogat wanpela man inap long tok olsem, mi ken mekim mi yet kamap klin (Gutpela Sindaun 20.9). Yumi olgeta nidim **Jisas** long mekim yumi i kamap klin.

Taim mama bilong Lari i wasim Lari, em i kamap klin stret. Olsem tasol, taim **Jisas** i wasim yumi wantaim blut bilong em, bai yumi stap klin olgeta.

Rom 4.7-8 i tok, *"Sapos God i lusim pinis rong bilong ol man na tekewe sin bilong ol, ol dispela man i ken amamas. Sapos Bikpela i no tingim moa sin bilong wanpela man, dispela man i ken amamas."*

Translated by GUWA team (More little Visits with God)

Memori Ves

"Em i bin tromoi blut bilong en long bel bilong yumi, bilong pinisim asua bilong ol pasin nogut yumi bin mekim na bilong mekim yumi i save olsem yumi stap klin tru long ai bilong God."


Hibru 10.22a

TRAIM SAVE

Dia pren, ritim gut kwesten daunbilo na bekim ol ansa. Ol ansa i stap long tupela stori long hapsait. Sampela leta i stap pinis long helpim yu long lukim na pulimapim spes.

1. Jenis em i gel long wanem kantri? __m__ i __ __
2. Husat i tokim Jenis long wok bilong Jisas? S __ __ d __ S __ __ l __ i __ a
3. Taim Jenis i harim stori long Sande Skul pinis na i kam long haus, em i askim husat? __ a __ a __ __ __ a
4. Jenis i gat brata na wanem em i nem bilong en? __ __ b __
5. Husat i dai antap long diwai kros? __ __ s __ __
6. Wanem Baibel ves i tokaut long tromoi blut bilong en long bel bilong yumi? __ i __ r __ 1 __ . 2 __
7. Husat i askim Lari, sapos em i waswas pinis o nogat? __ __ m __
8. Mama i lukim wanem samting i stap long yau, maus na han pinga? __ o __ __
9. Namba tu taim mama i lukim Lari i no stap klin na mama i mekim wanem? w __ __ i __ __ __
10. Planti yangpela tude i toktok olsem husat? __ __ r __

Gutpela Wasman stori i kam long buk "More Little Visits With God." Translated by GUWA Team.



Published and printed by:
Publications Department
Evangelical Brotherhood Church (Inc.)
P.O. Box 996, Lae 411, Papua New Guinea

No 2/2017